

De Hibbegonder

Om vergangene Somsdaach hotts Kättche mich oogerufe. Honnes, hottse gesacht, Honnes, konnsde mol vorbeikumme? Ich kumm mettem Schorsch nimmi zerecht. Der hockt alls doorum unn guckt in oo Eck weiler moont, er det nimmi long mache. Er hott aach koon Abbedit mehr unn drinkt aach nix. Kumm emol vorbei, wenna geht gleich.

Isses so dringend?, habb ich gefroocht, ich wollt grad enn Brief schreiwe.

Kumm liewer gleich, hotts Kättche gesacht, du dest merr enn große Gefalle.

Ich also uffs Fahrrad unn hie zum Schorsch unn zum Kättche. Ich hatt hinner dere ihm Door grad dess Fahrrad abgestellt, doo kimmts Kättche schunn aus de Hausdier. Schee dasde gleich kumme bist. Ich waaß werklich nit was ich mett dem Monn noch mache soll. Kumm eroi, Honnes.

Im Hausgong habb ich gefroocht: Wo isser dann, unsern Schorsch?

Ei, gibts Kättche zur Antwort, der sitzt im ehemalige Kinnerzimmer unn guckt die Wänd oo. Trinksde enn Kaffee?

Ich habb genickt. E Tässje Kaffee kann nix schade.

Sachts Kättche: Ich mach derrn, gieh schunn emol zu doim Kumpel.

Dann habb ich onn die Dier vom Kinnerzimmer gekloppt, habb awwer koo Antwort kriecht unn bin enoi. Doo sitzt de Schorsch mitte in de Stubb uffem Stuhl, hott die Fieß uff e ahl Konnebee gestreckt unn die Händ hinnern Kopp geleeht, unn hott noch nit emol Antwort gewwe, als ich Gude gesacht habb.

Ich habb merr enn Hocker ebei gehollt, habb mich newer de Schorsch gesetzt unn haben oogeguckt. Schorsch, habb ich gefroocht, was issen los mett derr?

Hottse dich gehollt?, hott de Schorsch geknorrt, dess sieht dere ähnlich.

Ich habb mich uffen zu gebeucht: Schorsch, was hosde dann? Sach merrs.

De Schorsch hott gehust. Warum bisden kumme? Willsde von mir Abschied nemme?

Ich habb gonz bleed geguckt. Abschied nemme? Was babbelsde dann ferr Zeich?

Emm Schorsch soi Stimm war gonz schwach. Ich bin schwer kronk unn mach nimmi long. Unn deshalb sitz ich doo unn iwwerleech alls, was ich noch zu erledische habb. Was soll ich aach noch groß unnernemme? Moi Zeit iss abgelaafe, die paar Daach krieh ich noch erumm. Jetz waaßde was mett mer los iss.

Schorsch! Ich war joo gonz entsetzt. Jetz erzähl merr was bassiert iss.

Dem Schorsch hawwe Träne in de Aache gestonne. Honnes, dess mussde doch gemerkt hawwe: Wenn merr uff die Wart laafe, kumm ich doch den Bersch zu de Kapell kaum noch enuff. Ich habb koo Luft mehr. Unn deshalb bin ich letzt Woch zu moim Dokter gonge. Der hott mich unnersucht unn waaßde was der mir gesacht hott?

Ich war gonz erschrocke. Ei was dann, Schorsch?

De Schorsch druff: Er hott mir gesacht, er det nix finne. Awwer ich soll mittags nit immer om Fernseh sitze, soll e bisje mehr laafe unn abnemme soll ich aach. Sunnst hätt ich nix, ich wär kerngesund.

No unn? Ich bin uffgesprunge unn habb dem Schorsch uff die Schulter gekloppt. Ei Schorsch, du Hibbegonder, dann iss joo alles in Ordnung.

Ewe nit, flennt de Schorsch, weil als ich beim Dokter die Dier enaus bin, habb ich mich nochemol erumgedreht. Unn doo seh ich, mett was ferr Aache der mir noochgeguckt hott. Honnes, so guckt enn Dokter nor wenna waaß, den doo siehde nimmi long.

Eiern Honnes